

RELACION

PËR

PROJEKTLIGJIN “PËR DISA NDRYSHIME DHE SHTESA NË LIGJIN NR.9632, DATË 30.10.2006, “PËR SISTEMIN E TAKSAVE VENDORE”, TË NDRYSHUAR”

I. QËLLIMI I PROJEKTLIGJIT DHE OBJEKTIVAT QË SYNOHEN TË ARRIHEN

Propozimi i projektligjit “Për disa ndryshime në ligjin nr.9632, datë 30.10.2006, “Për sistemin e taksave vendore”, të ndryshuar, është mbështetur në nenet 78, 83, pika 1, dhe 155, të Kushtetutës. Ky projektligj është pjesë e paketës fiskale 2019.

Projektligji synon disa ndryshime dhe shtesa në ligj, si dhe në anekset që i bashkëlidhen ligjit, me qëllim thjeshtimin e kuptimit të dispozitave për zbatimin e tyre nga njësitë e vetëqeverisjes vendore.

Ndryshimet ligjore të propozuara për ligjin nr.9632/2006, të ndryshuar, nuk prekin nivelet ekzistuese të taksave.

Këto ndryshime synojnë të përmirësojnë dispozitat e ligjit, si dhe për të lehtësuar zbatimin e tij.

II. ARGUMENTIMI I PROJEKTAKTIT LIDHUR ME PËRPARËSITË, PROBLEMATIKAT, EFEKTET E PRITSHME

Ndryshimet e propozuara në këtë projektligj janë pjesë e propozimeve të paketës fiskale 2019, që nuk sjellin ndryshime të nivelit të taksave, por kanë si qëllim:

- a) harmonizimin në tërësi të ligjit me ndryshimet që vetë ligji ka pësuar deri më tani, si dhe me ligjet e veçanta të miratuara, që janë ligji nr.139/2015, “Për vetëqeverisjen vendore”, dhe ligji nr.68/2017, “Për financat vendore”, si dhe ligji nr.115/2014, “Për ndarjen administrativo-territoriale të njësive të qeverisjes vendore në Republikën e Shqipërisë”;
- b) lehtësimin e kuptimit dhe të interpretimit ligjor të disa dispozitave të veçanta të tij. Ndryshimet dhe shtesat në ligj synojnë që dispozitat e ligjit të bëhen të kuptueshme dhe të zbatueshme.

Projektligji, synon të sqarojë më konkretisht kush janë rastet e përjashtimit nga pagesa e taksës së ndërtesës për ndërtesat e banimit për pensionistë, si dhe për ndërtesat kulturore.

Projektligji parashikon të rregullojë edhe nenin 27, “Taksa e ndikimit në infrastrukturë”, duke synuar thjeshtimin e zbatimit të këtij neni.

Gjithashtu, në projektligj propozohet që taksa e tabelës të përcaktohet në një nen të vetëm, nga dy që janë aktualisht, i përkufizuar dhe kategorizuar në harmonizim me aneksin 7, bashkëlidhur ligjit.

Në projektligj propozohet që rrjetet kabllore telefonike, ndërlidhëse, apo të shërbimit informatik, u nënshtrohen tarifave vendore në rastin kur subjektet përdorin rrjete infrastrukturore të tilla: si tubacione, kanale etj., që janë ndërtuar dhe që janë në pronësi të njësive të vetëqeverisjes vendore. Gjithashtu, të ardhurat e siguruara nga këto tarifa do të përdoren për përballimin e shpenzimeve për mirëmbajtjen e rrjetit në përdorim.

Projektligji parashikon shfuqizimin e anekseve 4, 5 e 6, të cilët, për shkak të rregullimeve ligjore në ligjin aktual, nuk gjejnë zbatim.

Ndërkohë, anekset 2, 2.1, 3 dhe 8, bashkëlidhur ligjit në fuqi, janë të formatuara sipas ndarjes së vjetër territoriale përpara hyrjes në fuqi të ligjit nr.115/2014, “Për ndarjen administrativo-territoriale të njësive të qeverisjes vendore në Republikën e Shqipërisë”. Për këtë arsye, tabelat e këtyre anekseve janë rikonceptuar sipas ndarjes së re territoriale. Projektligji parashikon që anekset 2, 2.1, 3 e 8, të ligjit aktual, të zëvendësohen përkatësisht me anekset me numrat 1, 2, 3 dhe 8, të rikonceptuara, duke zëvendësuar njëkohësisht numrat e anekseve 2 e 2.1, përkatësisht me numrat 1 e 2.

III. VLERËSIMI I LIGJSHMËRISË, KUSHTETUTESHMËRISË DHE HARMONIZIMI ME LEGJISLACIONIN NË FUQI VENDAS E NDËRKOMBËTAR

Projektligji është mbështetur në nenet 78, 83, pika 1, dhe 155, të Kushtetutës.

IV. VLERËSIMI I SHKALLËS SË PËRAFRIMIT ME ACQUIS COMMUNAUTAIRE (PËR PROJEKTAKTET NORMATIVE)

Projektligji nuk synon përafrimin me legjislacionin *acquis communautaire* të Bashkimit Evropian.

V. PËRMBLEDHJE SHPJEGUESE E PËRMBAJTJES SË PROJEKTAKTIT

Projektligji nuk prek nivelet e taksave vendore të përcaktuara në ligjin aktual. Ai synon harmonizimet dhe standardizimet e nevojshme ligjore, për t’u përshtatur me ndryshimet që ligji ka pësuar në vite, si dhe të ligjit për vetëqeverisjen vendore, ligjit për financat vendore, ligjit për ndarjen territoriale.

Më konkretisht, ky projektligj parashikon, si më poshtë vijon:

- Në nenin 1 të projektligjit parashikohet ndryshimi në përmbajtje i pikës 5, të nenit 3, “Përkufizime”, për të qenë në harmonizim me ndryshimet që ka pësuar në kohë ky ligj.
- Në nenin 2 të projektligjit parashikohet rregullim termi në nenin 5, për t’iu përshtatur legjislacionit aktual në fuqi.
- Në nenin 3 të projektligjit parashikohet riemërtimi i aneksit 2.1 në “Aneksi 2”.
- Në nenin 4 të projektligjit parashikohen riformulime dhe shtesa në pikën 6, të nenit 22, për të sqaruar rastet e përjashtimit nga taksa e ndërtesës për disa kategori ndërtesash.
- Në nenin 5 të projektligjit parashikohet riformulim i shkronjës “c”, të nenit 22/4, të ligjit.
- Në nenet 6 e 7 të projektligjit parashikohen riemërimi i anekseve 2 dhe 2.1 të përmendura në nenet 23 dhe 23/1, të ligjit, respektivisht në “Aneksi 1” dhe “Aneksi 2”.
- Në nenin 8 të projektligjit parashikohet që në nenin 24 të ligjit, krahas bashkive, të shtohet dhe Drejtoria e Përgjithshme e Taksës së Pasurisë, si institucion që duhet të marrë të dhëna për ndryshimet në regjistrin e pasurive të paluajtshme nga Zyra Vendore e Regjistrimit të Pasurive të Paluajtshme.
- Në nenin 9 të projektligjit parashikohen rregullime në pikat 1, 2 e 3, të nenit 27, “Taksa e ndikimit në infrastrukturë”, me qëllim thjeshtimin e zbatimit të nenit.
- Në nenin 10 të projektligjit parashikohet ndryshimi në titull dhe në përmbajtje i nenit 32, “Taksa të tjera”, duke e riemëruar “Taksa e tabelës”, me qëllim që kjo taksë të përcaktohet me dispozita në një nen të vetëm dhe shfuqizuar nenin 32/1.
- Në nenin 11 të projektligjit parashikohet shfuqizimi i nenit 32/1, “Taksa e tabelës”.
- Në nenin 12 të projektligjit parashikohet shtim paragrafi në pikën 4, të nenit 35, “Tarifat vendore dhe administrimi i tyre”.

- Në nenin 13 të projektligjit parashikohen riformulime termash në ligj, për t’iu përshtatur legjislacionit aktual në fuqi.
- Në nenin 14 të projektligjit parashikohet shfuqizimi i anekseve 4, 5 e 6, që i bashkëlidhen ligjit.
- Në nenin 15 të projektligjit parashikohet që anekset 2, 2.1, 3 dhe 8, bashkëlidhur ligjit, të zëvendësohen përkatësisht me anekset 1, 2, 3 dhe 8, bashkëlidhur këtij projektligji.
- Në nenin 16 të projektligjit parashikohet hyrja në fuqi e tij.

VI. INSTITUCIONET DHE ORGANET QË NGARKOHEN PËR ZBATIMIN E KËTIJ PROJEKTAKTI

Për zbatimin e këtij ligji ngarkohen Ministria e Financave dhe Ekonomisë dhe njësitë e vetëqeverisjes vendore.

VII. PERSONAT DHE INSTITUCIONET QË KANË KONTRIBUAR NË HARTIMIN E PROJEKTAKTIT

Ministri i Shtetit për Mbrojtjen e Sipërmarrjes ka përcjellë disa sugjerime nga ana e shoqatave të biznesit lidhur me mënyrën e vendosjes nga bashkitë të taksave të përkohshme dhe të tarifave vendore, të cilat nuk mund të merren parasysh, pasi janë të rregulluara me dispozita të veçanta në ligjin nr.68/2017, “Për financat vendore”.

VIII. RAPORTI I VLERËSIMIT TË TË ARDHURAVE DHE SHPENZIMEVE BUXHETORE

Ky projektligj nuk paraqet efekte në buxhetin e shtetit dhe buxhetet e njësive të vetëqeverisjes vendore.

KËSHILLI I MINISTRAVE